

國

朝

列

卿

紀

國朝列卿紀卷之一百二

總理河道敘

夫憲臣治河者非古制也自大禹作司空平水土

空掌邦土並重其事秦漢有都水長丞主陂塘灌溉保守河渠  
自太常少府及三輔皆有其官漢武帝以都水官多乃置左右  
使以領之成帝河平元年又命王延世爲河隄使者以隄成賜  
爵關內侯至哀帝省使者官至東京凡都水皆罷之晉有都水  
臺使者梁有大舟卿隋唐有河渠署令丞各一人至玄宗開元  
十六年以宇文融充九河使而其任始重宋太祖乾德五年念  
河渠潰決爲民患詔開封等十七州長吏兼本州河隄使太宗

興國二年河決命左衛大將軍李崇矩往治九年河決又命侍衛步軍都指揮使田重進往治真宗咸平三年命隄防轉運使勿委以他職仁宗天聖五年命轉運使五日一奏河事至和二年命龍圖閣直學士施昌言總領其事哲宗元祐元年命秘書監張問相度河北水勢元符二年又命張商英爲龍圖閣待制河北都轉運使兼專功提舉河事南渡以降皆以京朝官三班使臣充亦有以本處監當兼掌者元仁宗元祐十一年又特命工部尚書賈魯爲總制河隄使進秩二品然歷代治河特謹水患而已非賴之以濟漕運惟元都於燕至元末以江南貢賦未達於都始從郭都水議自濟寧至臨清開渠數百里引水入御

河直抵通州濟漕名曰會通河於是終元之世公私漕販南北無阻爲國家大利 國朝建都金陵漕運事寢所謂堰築崩壞淤塞殆盡及用兵梁晉間使大將軍徐達開場場口入於泗以通運道後因河口壅淤乃修師家莊石佛諸閘又開濟寧州西耐牢陂接引西鄆黃河水以通梁晉之粟永樂初徙都北京貢賦仰資東南悉由海運糧艘往往淪沒風濤九年以濟寧州同知潘叔正言特命工部尚書宋禮同都督周長等發山東丁夫鑿會通河又同刑部侍郎金純開黃河故道自開封城北起下達鄆城至魚臺場場口以入漕河至十年始議會通河僭運北京至十三年遂罷海運而平江伯陳瑄亦疏鑿淮揚一帶南至

漕運遂會通矣。緊後河道奔潰壅溢數省繹騷。間遣部院大臣  
徃治。事畢則罷。其運河自濟寧分南北界。或差左右。通政少卿  
或都水司屬分理。又遣監察御史錦衣衛千戶等官巡視其沿  
運河之閘泉及徐州呂梁二洪。皆差官管理。或以御史或以郎  
中。或以河南按察司官。後皆革去而止。設主事三年一代。然皆  
爲漕運之河。不爲黃河也。惟總督河道大臣則兼理南北直隸  
河南山東等處黃河。亦以黃河之利害與運河關也。總督之名  
自成化弘治間始。或以工部侍郎。或以都御史。至正德四年以  
來定爲額員。專命憲臣提督。常於濟寧駐劄。凡漕河事悉聽專  
掌。官區處他官不得侵越。凡所徵椿草并折銀錢備河道之

用者毋得以別事擅支凡府州縣添設通判判官主簿開壩官  
專理河防不許別委凡府州縣管河及開壩官有犯行巡河御  
史等官問理別項上司不得徑自提問其視前代豈不益重哉  
我國家漕河形勝誠天造地設而有所待者夫自通州以至  
儀真凡三千里而南旺分水適當其中南由閘抵徐州則會黃  
河至淮安入海而揚州湖水接之以達於江北由閘抵臨清則  
會衛河至天津入海而通州白河接之以達於京南北地理之  
遠近旣侔而水道之接濟亦類雖圖畫亦不能盡其妙誠天下  
河道第一形勝我聖朝億萬載無疆之業也彼胡元烏足以  
當此第時異勢殊弊由法起名爲轉輸而變爲直達旣乃公私

交征軍疲民困至使論者復有於海於陸之思則豈先朝之  
初意然哉今詳各官宦履於後其行實見於事紀其勲德茂著  
者表爲列傳

國朝列卿紀卷之一百二

總理河道尚書侍郎都御史年表

宋

禮

河南永寧人太學生永樂九年以工部尚書治河詳工部尚書

金

純

直隸涇州人太學生永樂九年以刑部左侍郎濬黃河詳禮工刑三部尚書

張

信

河南祥符人解元永樂九年以工部右侍郎濬河十二年謫交趾詳兵部侍郎

蔣廷瓚

直隸滑縣人薦舉永樂九年以工部右侍郎濬河十一年出為貴州左布政使詳工部右侍郎

劉

觀

直隸雄縣人進士永樂十五年以左都御史督漕河詳都察院左都御史

藺

芳

山西夏縣人孝廉永樂十五年以工部右侍郎疏河本年卒於官詳工部侍郎

黃

福

山東昌邑人舉人宣德四年以工部尚書兼詹事整理河道詳南京戶部尚書

石

璞

河南臨漳人舉人正統十二年以工部尚書治張秋沙灣詳兵部尚書



王永和

直隸崑山人舉正統十三年以工部右侍郎治沙灣詳工部尚書

王文

直隸東鹿人進士正統十三年以右都御史治沙灣詳內閣

徐有貞

直隸吳縣人進士景泰四年以右僉都御史治沙灣六年如左副都回院詳內閣

陳泰

福建光澤人解元景泰五年以左僉都御史治徐揚洪河詳總督漕運右副都

薛遠

直隸無爲人進士天順四年以工部右侍郎治南決河成化六年以尚書行視漕河詳南京兵部尚書

李顥

廣東博羅人進士成化六年以工部右侍郎治武清決河本年致仕

喬毅

山西樂平人進士成化六年以工部右侍郎治漕河詳工部左侍郎

王恕

陝西三原人進士成化七年以南京刑部左侍郎巡視河防詳吏部尚書

杜謙

直隸昌黎人進士成化十八年以工部左侍郎治徐河二十三年致仕

白昂

直隸武進人進士弘治三年以刑部右侍郎治原武決河并開高郵河詳刑部

陳政

江西新昌人天順甲申進士弘治五年以工部左侍郎兼左僉都治張秋河本年卒於官

劉大夏

湖廣華容人進士弘治六年以右副都御史治張秋河詳兵部尚書

張縉

山西陽曲人進士弘治七年以右通政治河十三年陞保定巡撫詳南京戶部尚書

韓鼎

陝西合水人成化辛丑進士弘治十三年以右通政督理河道

崔巖

湖廣郴州人進士正德三年以工部右侍郎督理河道詳工部左侍郎

以後永設

李堂

浙江鄞縣人成化丁未進士正德四年以工部右侍郎兼右僉都任六年致仕

劉愷

直隸新安人進士正德七年以右副都御史任詳禮部尚書掌通政司事

趙璜

江西安福人進士正德十年以工部右侍郎兼僉都御史任詳工部尚書

龔弘

直隸嘉定人成化戊戌進士正德十二年以右副都任十六年加工部右侍郎兼僉都仍任本年致仕

李璣 山東濮州人進士正德十六年以工部右侍郎任詳戶部總儲尚書

章拯 浙江臨海人進士嘉靖三年以右副都

盛應期 直隸吳江人弘治癸丑進士嘉靖六年以右都御史任八年被劾免

潘希魯 浙江金華人進士嘉靖七年以工部右侍郎兼左僉都任詳兵部左侍郎

李緋 河南固始人弘治乙丑進士嘉靖十年以右副都任十一年開仕

戴時宗 福建長泰人進士嘉靖十一年以右僉都任本年致仕後起撫鄖陽詳都察院右僉都

朱裳 直隸沙河人正德甲戌進士嘉靖十二年以右副都任十三年丁憂

劉天和 湖廣麻城人進士嘉靖十三年以右副都任十四年加工部右侍郎兼僉都仍任詳兵部提督團營

李如圭 湖廣澧州人弘治己未進士嘉靖十五年以右副都御史任詳戶部尚書

于湛 直隸金壇人正德辛未進士嘉靖十六年以右副都任十七年丁憂見戶部侍郎

胡纘宗

陝西泰安人正德戊辰進士嘉靖十七年以右副都任詳河南巡撫

朱裳

詳前嘉靖十八年再  
起任前職本年免

郭持平

江西萬安人正德丁丑進士嘉靖十八年以右副都任詳南京刑部右侍郎

周用

直隸吳江人弘治壬戌進士嘉靖二十二年以工部尚書兼右都任詳吏部尚書

韓邦奇

陝西朝邑人正德戊辰進士嘉靖二十三年以右副都任詳南京兵部尚書

于湛

詳前嘉靖二十四年再起原職任二十五年遷戶部右侍郎未任被劾聽調

詹瀚

江西玉山人正德丁丑進士嘉靖二十五年以右副都任詳刑部左侍郎

胡松

直隸績溪人正德甲戌進士嘉靖二十六年以右副都任詳工部尚書

王守

直隸吳縣人嘉靖丙戌進士二十七年以右僉都任詳南院右副都

方鈞

湖廣巴陵人正德辛巳進士嘉靖二十七年以右僉都任詳戶部尚書

何鰲

浙江山陰人正德丁丑進士嘉靖二  
十八年以右僉都任詳刑部尚書

汪宗元

湖廣崇陽人嘉靖己丑進士二十九年以右  
副都任三十年降福建叅政後進通政司使

連鑛

直隸永年人嘉靖丙戌進士三十  
年以右副都任詳總督漕運副都

曾鈞

江西進賢人嘉靖壬辰進士三十一  
年以右副都任詳南京刑部侍郎

胡植

江西南昌人嘉靖乙未進士三十四年以  
右僉都任三十五年丁憂詳總漕副都

孫應奎

浙江餘姚人嘉靖己丑進士三十  
五年以右副都任三十六年開仕

王學益

江西安福人嘉靖己丑進士歷南院右都三十  
六年起右都任本年陞南工部尚書以疾致仕

王廷

四川南充人嘉靖壬辰進士三十  
六年以右副都任詳都察院左都

林應亮

福建侯官人嘉靖壬辰進士二十九  
年以右副都任詳戶部總儲備

胡植

詳前嘉靖四十年再任本年改北  
院僉都未任陞總漕副都御史

孫植

浙江平湖人嘉靖乙未進士四

十年以右僉都任見南院右都

王士翹

江西安福人嘉靖戊戌進士四十年以僉都御史任四十二年陞總理南京糧儲右副都

陳堯

直隸通州人嘉靖乙未進士四十三年以工部右侍郎兼僉都任改刑部右侍郎未任

孫慎

直隸大寧都司人嘉靖甲辰進士四十四年以右副都任本年回籍

潘季馴

浙江烏程人嘉靖庚戌進士四十四年以右僉都任四十五年丁憂

朱衡

江西萬安人嘉靖壬辰進士四十五年以工部尚書兼左副都御史任以功加太子少保隆慶二年改工部

翁大立

浙江餘姚人嘉靖戊戌進士隆慶二年起右副都御史任陞工部侍郎

陳大賓

湖廣江陵人嘉靖甲辰進士隆慶四年以工部右侍郎兼僉都御史推尋丁憂

潘季馴

見前隆慶四年起任五年回籍

萬恭

江西南昌人隆慶五年以兵部左侍郎兼僉都御史任

傅希墊

直隸衡水人嘉靖丙辰進士萬曆二年由巡撫陝西

李世達

陝西涇陽人嘉靖丙辰進士萬曆五年由巡撫山東

楊俊民

山西蒲州人嘉靖壬戌進士萬曆十三年以總督漕運兼管河道十四年回部

總理河道行實

宋禮字大本河南河南府永寧縣人由大學生授山西按察司僉事改刑部員外陞禮部侍郎累官工部尚書永樂九年命同都督周長等發山東丁夫一十五萬登萊二府願趨事赴功之人一萬五千疏鑿會通河先是洪武二十四年河決原武縣黑陽山舊曹州兩河口漫過安山湖而會通河遂淤自濟寧至臨清三百八十五里舟楫不通乃於濟寧迤北置城村等遞運所凡軍需錢糧之輸北者悉陸運至德州凡七百里始入衛河至是疏鑿之又塞舊曹州鄆城兩處河口濬沙灣至舊曹州一帶河道又同刑部左侍郎金純等督河南運木夫開黃河故道自



開封城北起下達鄆城至魚臺縣塌場口入於漕河又疏山東七十二泉匯於分水故本年 太宗降綸音一章曰工部錦衣衛便差四箇官鋪馬裏去都齊到那黃河新開口子處討兩隻船從那里看將下來到舊曹州兩河口分開一路往會通河一帶去一路往穀亭這一帶來看那兩條河的水勢行的如何還看那黃河水比先是那一處漫過安山湖那一帶去淤塞了河道若是那原漫過水處低薄時就着再整治得高厚着不低薄時罷將文書去與宋尚書每知道欽此則其委任之重亦可見矣先是 朝廷開河道不過欲通天下貢賦未專於漕運也十年宋公始議會通河僭運北京其奏狀曰永樂十年某月

某日工部尚書宋禮奏海運糧儲每年五月太倉開洋直沽下卸待秋回京船隻中多被損壞亦有漂失不見下落者俱用修理補造分派江西湖廣浙江等布政司并直隸徽州府軍衛有司相兼修造俱限次年三月終完備駕赴太倉應用因限逼迫措料不及不免科斂鈔物買辦其間作弊受害者不可勝言造船者惟顧眼前之急不慮速成不堅之患計其所費物料人工又難細舉且如造下料海船一隻用百人駕使止運得米一千石若將用過人工物料估計價鈔可辦二百料河船二十隻每隻用軍二十名運糧四千石以此較之從便則可如將鎮江鳳陽淮安揚州四府歲徵糧米定撥七十萬石赴徐州并兗州府

糧米三十萬石赴濟寧州交納差撥近河徐州等衛旗軍一萬  
名各委指揮千百戶管領工部撥與二百料淺船五百隻一如  
衛河事例將前項倉糧從會通河僨運供給北京每三年海運  
二次使造船者無逼迫之患駕船者獲堅久之利以兩河并海  
運計之三年可得八百餘萬十年之間國有足食之備民無  
繁擾之憂至十二年遂罷海運而平江伯亦疏鑿淮揚一帶南  
北遂會通矣至今爲國大利而宋禮之功當爲第一都督周長  
侍郎金純亦不可不謂之賢勞厥後傳謂宋公有微過朝廷  
督責之革其冠帶止服儒巾治事其權中微而平江伯之功愈  
彰故今人惟頌平江而不及宋禮故丘文莊公嘗過會通河有

感賦詩曰清江浦上臨清閘簫鼓叢祠飲餽餘幾度  
過更無人語宋尚書後李文正公各有詩其意在言表矣餘詳  
南京工部

金純字德修直隸鳳陽府泗州人由大學生擢吏部文選司郎  
中累官刑部左侍郎永樂九年命看視河勢先是洪武元年

太祖高皇帝用兵梁晉間使大將軍徐達開塌場口入於泗以通  
運道後因河口壅塞淤乃修師家莊石佛諸閘又開濟寧州西  
耐牢坡接引曹鄆黃河水以通梁晉之粟後故道復塞至是命  
純發河南運木丁夫開濬故道自開封城北引水下達鄆城復  
入魚臺塌場口出穀亭北十里以修太祖時故事今所謂永

通廣運二閘也十年回京累官刑部尚書詳刑部

張信字懋孚河南開封府祥符縣人革除己卯解元永樂九年以工部右侍郎濬河道十二年謫交趾詳兵部

蔣廷瓚字邦瑞直隸大名府滑縣人永樂九年以工部右侍郎濬黃河十一年出爲貴州左布政使詳工部

劉觀字直隸保定府雄縣人洪武乙丑進士永樂十五年以都察院左都御史會提督漕河浚壅淤以便糧艘令行禁止而漕行不滯本年回院宣德三年以賊貪命巡視河道四年下獄詳都察院

蘭芳字山西夏縣人永樂十五年以工部右侍郎提督漕

河之事本年卒於官詳工部

黃福字如錫山東萊州府昌邑縣人宣德四年以工部尚書兼詹事命整理河道五年回京調行在戶部歷南京戶部尚書叅贊機務詳南京戶部

石璞字仲玉河南彰德府臨彰縣人正統十三年以工部尚書命治沙灣決河不能成功本年回部歷兵部尚書詳南京都察院

王永和字以正直隸蘇州府崑山縣人永樂甲午舉人歷兵科都給事中正統十三年以工部右侍郎命治沙灣決河不能成  
功本年回部詳工部

王文字千之直隸保定府東鹿縣人正統十三年以都察院右都御史命績治沙灣決河不能成功本年回院歷左都御史改吏部尚書詳內閣

徐有貞字元玉直隸蘇州府長洲縣人宣德癸丑進士累官左春坊左諭德兼翰林院侍讀景泰四年冬十月十一日景皇以河決沙灣七年久弗克治集左右丞弼暨百執事之臣於文淵閣議舉可治水者僉以有貞應詔乃錫爾書命行之有貞祇承明命戒吏飭工撫用士衆咨詢羣策率勦厥事已乃周爰巡行自北東徂南西踰灣汶沿衛及沁循大河道濬洸以還旣究厥源因度地行水乃上陳於上曰臣聞用平水土其

要在得天時地利人事而已天時旣經地利旣緯而人事於是乎盡且夫水之爲性可順焉以導不可逆焉以湮禹之行水行所無事用此道也今或反是治所以難蓋河自雍而豫出險隘而之夷曠其勢旣肆又由豫而兗土益疏水益肆而沙灣之東所謂大洪之口者適當其衝於是決焉而奪濟汶入海之路以去諸水從之而洩隄以潰渠以淤澇則溢旱則涸此漕途所謂阻者然欲驟而堙焉則不可今欲救之請先疏其水勢平乃治其決決止乃濬其淤因爲之方以時節宜俾無溢涸之患必如是而後有成 制曰可有貞乃經營焉作治水之牒疏水之渠起張秋今隄之首西南行九里而至於濮陽之濊又九里而至



於博陵之隄又六里而至於壽張之沙河又八里而至於東西影塘又十有五里而至於白嶺之灣又三里而至於李準之涯由李準而上又二十里而至於竹口蓮花之池又三十里而至於大渚之潭乃踰范暨濮又上而西凡數百里經澶淵以接河沁河沁之水過則害微則利故遏其過而導其微用平水勢旣成名其渠曰廣濟牒曰通源渠有分合而牒有上下凡河流之旁出而不順則堰有九長袤皆至萬丈九堰旣設其水遂不東衝沙灣乃更北出以濟漕渠之涸阿西鄆東曹南鄆北沮洳而資灌溉者爲頃百數十萬行旅旣便居民旣安有貞知事可集乃參綜古法擇其善而爲之加神用焉爰作大堰其上建以水

門其下繚以虹隄堰之架濤截流柵木絡竹實之石而鍵之鐵  
蓋合土木火金而一之用平水性旣乃導汶泗之源而出諸山  
匯澶濮之流而納諸澤遂濬漕渠由沙灣而北至於臨清凡二  
百四十里南至於濟寧凡二百一十里復作放水之牐於東昌  
之龍灣魏灣凡八爲水之度其盈過丈則放而淺之皆通古河  
以入於海上制其源下放其流旣有所節且有所宜用平水道  
由是水害以除水利以興初議者多難其事至欽棄渠弗治而  
由河沁及海以漕然卒不可行也時又有發京軍疏河之議有  
貞因秦蠲瀕河州縣之民馬役庸役而專事河防以省軍費輕  
民力 天子從之是役也凡用人工聚而間役者四萬五千有

奇分而常役者萬三千有奇用木大小之材九萬六千有奇用竹以竿計倍木之數用鐵爲勛有十二萬錠三千組百八釜二千八百有奇用麻百萬荆倍之藥結又倍之而用石若土則不計其筭然其用糧於官以石計僅五萬而止自始告祭興工至於工畢凡五百五十有五日承命於景泰癸酉之冬經始於甲戌之春施工於乙亥之夏而告成之於秋上詔見奉天門嘉勞焉因命之居京管臺事丙子春有良請勅載至乃擴前功益爲大水之備時方曠乾衆莫喻其意頗以爲過防及秋而大水洊至泗汶淇衛河沁一時俱溢環東兗之間若海之浸者三月逮冬始平運河南北千餘里故隄高岸之缺而不完者無

慮百數十所而沙灣之正隄大堰獨歸然而存疑然而安其旁  
近之城郭田疇皆恃焉而免墊沒之患以水之來有所捍而去  
有所洩也於是東充之軍民耆老合辭以請今茲之水蓋洪武  
以來所未嘗有而耄耄之人所未嘗見也今隄與堰爲之保障  
非牐與渠爲之排解吾田吾產其池潢矣吾耄吾倪其魚鱉矣  
然水之變不測今茲之溢以龍灣六牐洩之而猶未盡也以故  
感應祠之缺隄又須公爲之救築焉而益爲之防焉有貞曰唯  
唯月中旣築感應祠之缺而作堰月之隄鱉甲之堰比沙灣水  
門大堰差小而堵法略等復行度東昌龍灣六牐之上官審之  
口置牐一穿新渠而屬之東平載廟之津置牐一疏古河而屬

之決河并前六牘爲八而皆注之海焉乃探禹之遺秘本星土  
經緯之理鑄玄金而作法象之器建之隄表大河感應二祠之  
中以爲悠久之鎮蓋盡人事符天造制物宜假羣神其道并行  
也旣訖工有貞復回院後入閣詳內閣

陳泰字吉亨福建邵武府光澤縣人永樂癸卯舉人景泰五年  
以都察院左僉都御史疏理徐州呂梁二洪及儀真至濟寧諸  
處河道七年改撫蘇松等府詳總督漕運

薛遠字繼遠直隸廬州府無爲州人天順四年以工部右侍郎  
命治河南決河回部改戶部歷左侍郎總儲尚書成化六年仍  
命治河南本年回部歷南京兵部尚書詳南京兵部

李順字思誠廣東惠州府博羅縣人正統丙辰進士授戶部

司主事改刑部

年陞

司員外郎十四年陞福建僉事

景泰六年陞福建左叅政天順年陞山東右布政使四年陞浙  
江左布政使成化二年陞工部右侍郎六年命治武清決河  
年致仕詳工部侍郎

喬毅字志弘山西太原府樂平縣人正統戊辰進士擢吏科給  
事中歷大理寺左少卿成化六年以工部右侍郎命治漕河時  
亢旱水淺舟膠檄有司加工疏濬齋沐禱於江海之神江潮泛  
湧入漕河運船乘潮通行人謂精神所感八年遷工部左侍郎  
詳工部

王恕字宗貫陝西西安府三原縣人成化八年以南京刑部左侍郎命巡視河防恕奏揚州一帶全藉湖水議將河身比湖身濬深三尺則湖水自來雖旱亦可不阻船又高郵湖每遇西風損壞船隻議濬內堤作外堤以便行船修復閘座從之九年改南戶部遷都察院左副都御史巡撫雲南歷右都御史改南院右都御史南京兵部尚書致仕後起吏部尚書詳吏部

杜謙字益之直隸永平府昌黎縣人正統丁卯領順天鄉薦會試不偶以國子生歷事戶部時山陽金濂爲尚書待下方嚴獨肅謙欲奏薦爲屬謙力辭之景泰甲戌登進士朝廷修寰宇通志遣采事實於山東還授工部都水司主事督呂梁洪七年

改禮部主客司三年考最受勅進階承德郎天順庚辰陞本  
司署員外郎癸未陞郎中本年以父憂去任成化三年服除改  
儀制司郎中成化戊子冊封晉府充副使五年詔廷臣三  
品以上各舉所知時姚夔在禮部知謙才可用即以名上擢浙  
江布政司右叅議乙未陞本省右布政丁酉轉左布政使庚子  
召爲順天府尹壬寅陞工部左侍郎甲辰漕河淤卽以命謙  
方見嚮用丁未勘事大同還乞致仕益謙年六十九矣旣還鄉  
以詔恩進資善大夫夫人以爲榮而謙尤康強不衰凡八年以  
疾不起享年七十有六謙居官善理事爲工部主事時在徐州  
值歲饑疾區畫荒政作粥食人多所全活推其餘及牧養孤老



男女過時而貧不能嫁娶者皆出所助呂果之人至今思之而平生政績尤多在新江時平易明決既能使民懷而吏畏至於賓接士人忘其勢分而禮法之際有所不可離顧要亦不肯阿從也初各省以織造上供文綺不如法者獲重譴衆因畏避至積數年所織造者久而濕蒸多壞工人或破家不能償謙曰利吾身以害人吾不忍也遂合數郡解運卒亦無事人始免患營清理軍伍有訴於御史得更衛者謙以爲非例持其文不下御史雖恚不怒也他日定賦役等第按察使欲增損其則而盡貸無產之家謙以此輩皆游民而令賦役默歸於力穡之農非重本抑末之意卒從謙議歲侵特奏免田租若干舊有起運存留

之數戶部以起運者不可免而止免存留者謙言若然則一省  
官俸軍餉俱乏矣二者必增損之乃可執奏不已 報廷亦竟  
從之及在工部適運河淤塞受 勅修濬因以其屬從行得便  
宜行事謙盡心水利不憚勞苦數月舟行無阻人私稱便已而  
兵部尚書余子俊巡撫大同多費公帑物有誣其侵漁者時受  
勅偕給事中御史往覈其實或謂謙曰 上怒叵測公與余有浙  
省同僚之舊辭之可免禍謙曰吾知奉公守法而已他何足計  
瀕行又有以危言怵之者亦不顧卒得其實而還余之事竟白  
其幹濟如此者故凡被委命事竣輒受 賜賚云居家事親能  
盡子道父嘗病疽醫莫敢療泣禱於天躬吮之良久愈後父年

九十猶就養於官以浙地善且迎其兄姊事之人稱其孝友者  
無間言自少無聲色之奉雖退食燕居必正襟端坐妻子不敢  
狎視至接人臨下更溫厚可親是以人皆愛之又待人不以升  
沈易節在呂梁時商文毅以罪罷遇之尤厚後商人相每汲引  
之

漕志云徐州洪舊名百步最爲險要成化癸卯甲辰自春夏而  
秋沆暘少雨洪流不絕者一朞或稍漲亂石中四泄而下舟楫  
上下惟艱是年秋募工伐石於山八月戊寅輦石作隄工未竟  
工部左侍郎杜公益之檄濬茶城河將大衆相河身之生地因  
其直而鑿之俾就故道至乙巳三月畢工再兩越月石隄始成

長通八千丈闊計三丈許自是減洪夫歲辦草束三分之一下  
洪障水舊用草壩上覆以土更砌以石延袤一百餘丈廣一百  
一十五丈引中流水涸出露若大花小花鴨子材諸石凡傷舟  
者漸次鑿去計三十餘處

白昂字廷儀直隸常州府武進縣人天順丁丑進士累官刑部  
左侍郎弘治二年秋河決汴金龍口溢於山東損運道山東守  
臣上其狀 天子勅昂以戶部左侍郎往治昂奏分揚州管河  
通判居瓜洲鎮使軍民有所統一又奏濬瓜洲儀真壩口至揚  
州灣頭運河既訖工乃視運道自山東抵揚州議所治濬治時  
監察御史孫行工部郎中吳瑞董河事與巡撫右副都御史李

昂漕帥署都督僉事都勝署都指揮同知郭鉞令議高郵州運道九十里而三十里入新開湖湖東直南北爲隄舟行其下自國初以來障以椿木固以磚石決而復修者不知其幾其西北則與七里張良珍珠甓社諸湖縈迴數百里每西風大作波濤洶湧舟與沿隄故椿石遇輒壞多沈溺前此董河事者嘗議修湖東鑿復河以避風濤便往來今舉運河便利宜莫先於此者昂議允遂相地興工開鑿起州北二里之杭家嘴至張家溝而止長竟湖廣十丈深一丈有奇而兩岸皆壅土爲隄椿木磚石之固如湖岸首尾有間與湖通岸之東又爲閘四爲涵洞一每湖水盛時使從減殺焉以三年三月始事凡四閱月而成自是舟

經高郵者人獲康濟昂因採衆議聞之上名曰康濟河往來便焉後官至刑部尚書詳刑部

陳政字以正江西瑞州府新昌縣人天順壬午領江西鄉薦甲申登進士第初授工部營繕司主事遇事輒區處得宜有豪右侵占畿內官地反誣隣僧者徃勘得實皆感服及監收薪炭出納公平無敢厚取以自私者大役德之將受代爭赴闕下言政不可去遂復留一年績譽日著成化三年姚文敏公爲吏部乃奏改文選司主事辛卯陞驗封司員外郎丁酉充副使封

遼府長垣王戊戌陞郎中本年推選補通政司右叅議庚子轉左叅議壬寅進右通政癸卯丁內艱服除轉左通政丁未擢工部

右侍郎本年轉左侍郎是年八月 憲宗升遐奉 勅營建

山陵上疏以衰老辭不允 上念督工之勤累遣中使以 璽書

下勞并賜羊酒白金等物及工完所以勞賜之者尤厚己酉京

師大水奉 命督修蘆溝橋及內外倉廩之傾圯者辛亥禮部

災督工修建皆有勞賜弘治壬子河溢汴梁之東蘭陽鄆城諸

縣皆被其患勢迫運道殆不可支議者以地兼河南山東及南

北兩畿事不統攝宜得大臣總理庶克有濟 上命政往令兼

都察院右僉都御史 賜以璽書而行政泣其境方將度地勢

以圖修浚行至儀真俄疾作遂卒享年五十四訃聞 上命有

司諭祭仍治葬事

劉大夏字

湖廣華容縣人天順甲申進士累官都察院右

副都御史初安平鎮舊名張秋實運河要地景泰間黃河支流  
決鎮之沙灣壞運河 朝廷命都察院右僉都御史徐有貞塞  
而隄之弘治六年復決於下流十里許汶水從之由東阿舊鹽  
河以入於海厥後霖潦大溢廣至九十餘丈運河自東昌而下  
率多淤涸舟楫不通 孝廟以爲憂勅大夏往治之又特勅  
內官監太監李興平江伯陳統總督山東兵民夫役與之共事  
時夏且半漕舟已集一經決口輒力數倍稍失手輒覆溺不可  
救食謂宜急先務乃於西岸稍南鑿月河長三里許引舟由之  
次第皆濟及冬水落乃爲塞決計規效古法酌以時宜築東西



二臺植木椿爲表多施大索用船雜置土石鑿而沈之壓以巨  
掃囊土以實其罅役夫番代閱三晝夜弗息而決始塞其外則  
甃石樹杙累築而固之又於其南爲石壩以備宣節又上疏賈  
魯河孫家渡塞荆隆口黃陵岡築兩長堤感水南下由淮徐故  
道又議以爲兩隄綿亘甚遠河或失守必復至張秋爲漕河憂  
乃相於舊決之處一里用近世減水壩之制植木杙中實磚石  
上爲衝水著以厚板又上漫以巨石屈盤以鍵之榆柳以植之  
壩成廣袤皆十五丈又其上甃石爲竇五梁而涂之梁可引縱  
竇可通水俾水溢則稍殺衝齒水涸則漕河獲濟庶幾殺不重  
費而功可保工旣告畢 上更命鎮爲安平賜興歲祿二十四

石如銳太保兼太傅增歲祿二百石遷大夏爲左副都御史佐院事又命工部伐石勅內閣臣爲文各紀功績命文學士李東陽記之累官兵部尚書詳兵部

張縉字朝用山西太原府陽曲縣人成化己丑進士歷山東叅政弘治癸丑河決張秋上命平江伯陳銳都御史劉大夏治之百需悉委調度甲寅功成遂陞其秩爲通政司右通政屬之行河時衝決之餘溝防不治縉相其緩急以漸修濬無所遺又於決口之東甃石岸數里以圖勿壞又新築南旺東隄樹柳其上每歲夏秋水溢挽卒得分行無阻至今便之庚申八月陞都察院石僉都御史巡撫保定等府詳南京戶部尚書

韓鼎字廷器陝西合水縣人成化辛丑進士擢禮科給事中丁  
未陳公鉉選等四事差陝西寧夏給散賞賚盡革侵漁之弊成  
申遷右給事疏却貢獅廣儲嗣上優詔答之進左給事論太常  
卿丁永中等由黃冠濫金紫神樂觀董素雲竊祭服火藏滅跡  
衆論快之親藩婚禮 詔給鹽一萬引爲助疏言大壞鹽法請  
令有司給價與之詔如其言時 詔求言乃陳謹大要崇節儉  
五事又因星變極陳時弊指斥貴近 上皆嘉納遷通政司叅  
議乙卯陳言剴直調南京尚寶司卿尋改南京通政司左叅議  
庚申擢右通政駐平安鎮督理河道申明禁例不爲勢所奪  
又置朱家淺等閘使水有節縮濬汶上萊蕪諸泉及淤河運舟

賴之隄南旺湖以障泛濫民得耕種其湖田流徙復業乙丑擢  
通政使督易州廠

崔巖字民瞻湖廣郴州人成化辛丑進士授戶部山西司主事  
弘治元年陞陝西司員外郎三年陞本司郎中五年陞山東左  
叅政十三年陞江西右布政使十五年歷陞河南左布政使正  
德元年陞都察院右副都御史巡撫大同地方三年改撫陝西  
一等處地方本年陞工部右侍郎總理河道四年陞工部左侍郎  
五年致仕

李堂字時升浙江鄞縣人成化丁未進士正德四年由南京光  
祿寺卿陞南京都察院左僉都御史勅整江南北舊制舟師

未幾陞工部右侍郎凡大舉措必竭兩端開誠商論共成國是  
兩奉 聖書督修京倉落成汴徐河惠告急 勅兼左僉都御  
史總理修濬抵曹縣因已集人夫築長隄自大名至沛縣二百  
餘里又自榮澤抵永城縣疏通水道以防潰決是時游雇劉六  
劉七兵荒言官乞暫取回京 詔可之瀕行會計河南工費二  
千兩外山東存積并追完各處缺工之數共銀五萬兩有奇收  
庫作國正計不許擅支後從巡撫便宜發此銀築汴城外郭防  
禦流賊民恃無恐存遺惠焉歸 命於朝坐大學士梁公儲尚  
書李公燧迎合廖張意朋計下石先幾引疾 詔許乘傳還鄉  
痊日有司勸駕 乾清宮災朝議起之不果詳工部侍郎

劉愷字

直隸保定府新安縣人弘治庚戌進士正德七年

任太常寺卿陞都察院右副都御史總理河道十年改兵部右侍郎掌通政司事十三年加禮部尚書掌司事愷之所不由選部給事中周用論之詳通政司

趙璜字庭實江西吉安府安福縣人弘治庚戌進士正德十年以工部右侍郎兼僉都御史任船趨河上率官民胼胝水勢稍退貽文河伯與共責任數日狂流壅沙護岸三埽告成人以爲神十一年改撫順天詳工部尚書

龔弘字直隸蘇州府嘉定縣人登成化戊戌進士授嚴州府推官二十一年陞南京刑部雲南司主事弘治三年陞廣東

司員外郎五年陞南京吏部文選司郎中七年陞兗州府知府十四年陞浙江右叅政十五年致仕正德九年改福建右布政使十年陞湖廣左布政使十一年陞應天府尹十二年陞都察院右副都御史總理河道十六年加工部右侍郎兼僉都御史仍舊任本年致仕

李瓚字一山東東昌府濮州人正德十六年以工部右侍郎任嘉靖二年遷戶部歷總儲尚書詳戶部

章拯字以道浙江蕭谿縣人弘治壬戌進士嘉靖三年以撫治鄖陽右副都御史改任六年加工部右侍郎適河變南旺一路運舟盡膠於沙拯露禱於泰山泉水忽湧繼以天雨河漕獲達

時有議開新河拯謂宜於單豐沛築堤不使淤漕渠烏可輕易  
廢百數十里之田朝議不協本年改命提督顯陵工程歷南京  
工部尚書詳工部

盛應期字斯徵直隸蘇州府吳江縣人弘治癸丑進士授工部  
都水司主事十年降雲南縣丞十四年陞祿豐知縣十六年陞  
順慶府通判正德元年陞武昌府同知本年丁憂四年補長沙  
府同知本年陞雲南副使十年陞河南按察使十一年陞山東  
右布政使十三年陞陝西左布政使十四年陞都察院右副都  
御史巡撫四川地方十五年丁憂嘉靖元年起撫江西地方三  
年陞兵部右侍郎兼右僉都御史總制兩廣軍務兼理巡撫剿



平劉召函首軍門四年回籍後起工部右侍郎督易州山廠六年陞都察院右都御史總理河道八年劾免

潘希魯字仲魯浙江金華府金華縣人弘治壬戌進士授兵科給事中歷提督四夷館太常寺卿陞南贛右副都御史嘉靖七年以工部右侍郎兼左僉都御史任曾考故詢謀相度要機以濟沛之淤由決河西衝掣閘河之水入昭陽湖不復南流而飛雲浦之水北漫故沙停而淤乃加築東隄以遏入湖之路築西隄以防黃河之衝費省而功速成十年改兵部歷左侍郎詳兵

部

李緋字

河南汝寧府固始縣人弘治乙丑進士授戶部福

建司主事正德四年丁憂七年補戶部湖廣司主事六年丁憂  
十二年補戶部廣東司主事本年陞四川司員外郎十三年陞  
山西司郎中嘉靖八年歷陞山東右布政使九年陞山東左布  
政使十年陞都察院右副都御史總理河道十七年閑住

戴時宗字

福建漳州府長泰縣人正德甲戌進士嘉靖十

年任大理寺少卿十一年以右僉都御史任本年改撫順天致  
仕後起撫鄖陽進都察院右僉都御史詳都察院

朱蒙字公垂直隸順德府沙河縣人正德甲戌登進士擢

道監察御史巡山西鹽法錢寧來求利拒不與有倖人奏討司  
空石公曰爾徒往朱御史不允汝也時御史王相被閹鑑構下

獄君抗疏曰 朝廷設御史如齊民畜貓捕鼠貓鼠相持主人其可助鼠耶疏鑑八罪土得從輕刑又勸 上戒佚樂近儒臣武皇巡幸諸司請大治備以候君不許後果有重斂獲譴者人曰如朱公在免此矣還 朝又諫止南巡數嬖人熒惑之禍十五年庚辰出知鞏昌以其故守治民儉而富安乃教皆鮮鮮以生嘉靖初 詔舉先朝故典選天下方面知府治行高者 賜燕勞止得八人君爲鞏昌守以清苦與列後終事中劉世楊等舉內外清正臣大學士石瑄而下八人君在中嘉靖四年陞浙江副使御史王璜按浙辟不畏勢浙有重人冤璜罷官君以副使至京重人問璜何如人君曰真御史也重人慚沮七年陞福建

按察使十年陞浙江左布政使十二年陞都察院右副都御史  
總督河道建牙於濟十三年丁憂自都御史守制還遷約如寒  
素居無賓堂土壁席門自奉常茹菜十八年再起原官仍前任  
本年夏五月卒於官性淳篤朴直斤斤懇懇目之所見必行言  
而雖久可復凡在官鑰戶遠嫌堂室如寺妻子甘非惡君益自  
信乃又寤經探賸以聖賢自飭謂尊德性道問學其的旨也衍  
而成論士頌其廉知友服其不市名民惠其不取享年五十有

八

劉天和字養和湖廣黃州府麻城縣人正德戊辰進士嘉靖十  
三年由巡撫陝西右副都御史丁憂起右副都御史任十四年

加工部右侍郎兼僉都御史仍前任本年取回部歷陞三邊總制左都御史南京戶部尚書改兵部尚書提督團營詳兵部

李如圭字


湖廣岳州府澧州人弘治己未進士嘉靖十五

年以右副都御史任十六年遷吏部右侍郎十七年歷戶部左侍郎總儲十八年陞南京工部尚書十九年改戶部尚書詳戶部

于湛字

直隸鎮江府金壇人正德辛未進士授兵部武選

司主事九年陞車駕司員外郎十一年陞職方司郎中十六年陞陝西右叅議本年改江西右叅議嘉靖元年陞雲南右叅政五年丁憂八年補河南右叅政九年陞山西右布政使十年陞

河南左布政使十二年陞都察院右副都御史巡撫順天未任  
本年開任十五年起都察院右副都御史巡撫陝西地方十六  
年改總理河道十七年終養丁憂二十四年起原職再任二十  
五年遷戶部右侍郎未任被劾聽調二十六年起原職撫鄖陽  
胡績宗字  陝西鞏昌府泰安縣人正德戊辰進士任河南  
左布政使嘉靖十七年以巡撫山東右副都御史改任十八年  
遷撫河南詳河南巡撫

郭持平字守衡江西吉安府萬安縣人正德丁丑進士任兵部  
主事嘉靖三年改吏部考功司陞稽勲員外郎陞副使十八年  
以右副都御史任二十一年加工部右侍郎兼僉都御史仍原

任二十二年遷南京刑部右侍郎詳南京刑部

周用字行之直隸吳江縣人弘治壬戌進士嘉靖二十二年以南京刑部尚書起工部尚書兼右都御史任疏請疏濬溝洫以防河決五事二十三年遷督漕運陞都察院左都詳吏部尚書韓邦奇字三石陝西西安府朝邑縣人正德戊辰進士四年任吏部考功主事五年陞本司員外郎六年改文選嘉靖十一年以按察司副使陞大理寺左少卿十二年陞都察院左僉都十四年陞巡撫遼東右副都御史未任改撫山西致仕二十三年起總理河道都察院右副都御史二十四年遷刑部右侍郎改吏部右侍郎二十五年陞南京都察院右都御史二十六年陞

南京兵部尚書

詹瀚字

江西廣信府玉山縣人正德丁丑進士嘉靖二十

一年任撫治郎陽右副都回籍聽調二十五年以右副都御史  
任二十六年遷刑部右侍郎歷左侍郎詳刑部

胡松字

直隸徽州府績溪縣人正德甲戌進士嘉靖二十

六年以右副都御史任二十七年改總漕歷戶部右侍郎詳工  
部尚書

王守字履約直隸蘇州府吳縣人嘉靖丙戌進士十三年任太  
常寺少卿提督四夷館十七年陞大理寺左少卿十八年陞南  
京光祿寺卿二十二年陞撫治郎陽右僉都御史二十三年改



督南京糧儲二十七年以右僉都御史任本年陞南院右副都御史詳南京都察院

方鈍字仲敏湖廣岳州府巴陵縣人正德辛巳進士嘉靖二十三年任大理寺右寺丞二十五年陞本寺右少卿二十六年轉左陞太僕寺卿二十七年以右僉都御史任二十八年遷南京大理寺卿二十九年陞南京戶部右侍郎三十年改戶部尋轉左三十一年陞戶部尚書

何鰲字 浙江紹興府山陰縣人正德丁丑進士嘉靖二十七年任應天府丞二十八年以右僉都御史任二十九年遷總督漕運詳刑部尚書

汪宗元字子允湖廣武昌府崇陽縣人嘉靖己丑進士授行人  
司行人陞南京工科給事中迴避改兵部武選司主事十八年  
陞尚寶司丞二十年歷本司少卿二十一年陞本司卿二十四  
年陞南京太僕寺少卿二十六年改南京鴻臚寺卿二十七年  
陞南京太常寺卿二十九年陞都察院右副都御史總理河道  
三十年降福建叅政三十五年任通政使

連鑛字伯金直隸廣平府永年縣人嘉靖丙戌進士三十年以  
右副都御史任三十一年陞督漕運

曾鈞字廷和江西南昌府進賢縣人嘉靖壬辰進士授行人歷  
南京吏科給事中奕奕有重名陞雲南副使

年陞四川叅

政

年遷廣東按察使

年陞福建右布政使

年轉

河南左布政使三十一年陞總理河道右副都御史三十二年

陞工部右侍郎兼右僉都御史仍前任三十四年陞南京刑部

右侍郎三十六年致仕贈尚書謚恭肅

胡植字立之江西南昌府南昌縣人嘉靖乙未進士任御史提

督南畿學校二十九年陞大理寺右寺丞三十一年轉左本年

陞本寺右少卿三十三年轉左三十四年陞總理河道右僉都

御史三十五年丁憂四十年再任本年改都察院僉都御史

未任陞總漕右副都御史本年調南光祿寺卿四十二年閑住

國朝列卿紀卷之一百二終

國朝列卿紀卷之一百三

巡撫江西等處地方

夫江西古揚州之域春秋屬吳又屬越戰國屬楚秦置九江郡漢增置豫章郡歷吳晉並隸揚州郡刺史至唐爲江南道宋爲江東西路元爲江西道隸江南諸道行御史臺我聖祖龍興削平僞漢江西首入版圖初置江西等處行中書省洪武九年革行中書省置承宣布政使司又置提刑按察司并都指揮使司統轄各府州縣衛所軍民舊有鎮守之設自辛丑年大都督朱文正統轄以來休養五十餘年一方晏然至永樂十九年定鼎北京勅尙書蹇義等二十六人巡行天下安撫軍民於是工

部侍郎郭璉同給事中

往江西等處興利除害考察官吏始

有巡撫之名然事畢則止未有定員宣德以後因豪俠橫暴稅糧逋負於是五年命都御史賈諒本年又命侍郎趙新及正統元年又命都御史王翱俱鎮守地方亦無巡撫專職至十三年閩浙兩廣寇發又命侍郎楊寧鎮守尋推韓雍代寧巡撫而巡撫之設已定於正統十四年矣於內天順至成化初年裁革及五年至十六年間又命南理卿夏時正戶侍原傑刑侍金紳各巡視至二十一年復設弘治三年至七年裁革及八年漳寇蜩起建議設江西巡撫於南贛專爲贛州南安建昌三府廣東潮惠韶雄四府福建汀州湖廣彬州一帶而設於十二年又添管

南昌等十府地方十三年十四年裁革惟南贛有專設及十五年又命僉都林俊巡視至十六年復設以後正德二年至四年嘉靖四年至五年雖裁革然暫革復設相沿至今不改況江西南距五嶺北奠九江據百粵上游爲三楚重輔方 聖祖初得江西僞漢來爭是天下大勢不在北而在南矣旣鄱陽奏凱僞主奔殪於是雍楚獨笑嶺背海翼莫不震鍛乞命及天戈北指中原遂定孰非江西爲之基耶是王業之興肇自江西其所以屹屹死守卒成鄱陽倚角之勢者以 聖德素孚於江右而得其死力焉爾則夫特盈保終以壯一方金湯之勢輔贊我 國家億萬載太平之基者巡撫事也亦安得晏然不置慮哉今詳

撫臣宦履於後其行實見於事紀其勲德茂著者表爲列傳若  
奉勅有事茲土者另列於首云

國朝列卿紀卷之一百三

勅使江西左右都侍郎等官年表

朱肇

以科給事中撫安江西  
人洪武三十二年

古朴

河南陳州人永樂四年以  
戶部左侍郎採木江西

郭璉

北直隸新安人永樂十  
九年以工部侍郎巡視

陳金

湖廣應城人正德六年以左  
都御史總制江浙閩廣軍務

俞諫

見巡撫正德八年以  
右都御史總制軍務

潘鑑

直隸婺源人嘉靖十七  
年以工部侍郎督木

江西巡撫附鎮守巡視侍郎卿都御史年表

賈諒

山東嶧縣人永樂辛卯鄉舉宣德五年以都察  
院右副都鎮守江西本年改鎮四川詳都察院



趙

新

浙江富陽人鄉舉宣德五年以吏部右侍郎鎮守江西正統四年改南吏部

王

翺

直隸鹽山人進士正統元年以右僉都鎮守三年遷理浙江鹽政詳吏部尚書

楊

寧

直隸歙縣人進士正統十三年以刑部右侍郎鎮守十四年還京詳南京刑部

正統十四年以後設巡撫

韓

雍

直隸長洲人正統壬戌進士十四年以右僉都巡撫天順元年調山西副使致仕詳兩廣總制

天順元年革巡撫至成化弘治以後或巡視或巡撫

夏時正

浙江仁和人進士成化五年以南京大理寺卿尋命巡視江西地方六年致仕

原

傑

山西陽城人進士成化九年以戶部右侍郎巡視十年回京

金

紳

應天上元人進士成化十二年以南京刑部右侍郎巡視江西地方十六年還京

閔

珪

浙江烏程人進士成化二十一年以右僉都巡撫本年調廣西按察使詳刑部尚書

李昂 浙江仁和人進士成化二十二年以右副都巡撫弘治二年改總督漕運詳總督漕運

金澤 應天江寧人進士弘治八年以右副都巡撫江西并南贛等處地方歷南院右都

張本 浙江錢塘人進士弘治十六年以都察院右副都巡撫江西正德元年致仕

林俊 福建莆田人成化戊戌進士正德元年以右副都巡撫二年致仕歷刑部尚書詳刑部

柴昇 河南內鄉縣人進士正德二年以右副都陞會革歷南京兵部尚書

二年以後逆瑾革巡撫五年復設定為巡撫

王哲 直隸吳江人進士正德五年以都察院右僉都巡撫江西六年致仕

董傑 直隸涇縣人進士正德六年以都察院右副都巡撫江西本年卒於官

任漢 四川溫江人進士正德七年以都察院右副都任九年養病

俞諫 浙江桐廬人進士正德九年以都察院右都巡撫江西地方十年回籍

孫燧 浙江餘姚人進士正德十年以都察院右副都巡撫江西地方十四年死逆濠難

王守仁 浙江餘姚人進士正德十四年任十六年陞南京兵部尚書封新建伯詳南京兵部

鄭岳 福建莆田人進士正德十六年以右副都任本年遷大理寺卿歷兵部左侍郎

陳琳 福建莆田人弘治丙辰進士正德十六年以右副都任嘉靖元年遷南京大理卿詳南京兵部

盛應期 直隸吳江人弘治癸丑進士嘉靖元年以右副都任三年遷兩廣總制詳總理河南

陳洪謨 湖廣武陵人弘治丙辰進士嘉靖三年以右副都任四年改撫雲南歷兵部左右侍郎

四年五年江西革巡撫

梁材 南京金吾衛籍順天大成人弘治己未進士嘉靖六年以右副都任本年遷刑部右侍郎詳戶部尚書

周廣 直隸蘇州太倉人弘治乙丑進士嘉靖六年以右僉都任九年遷南京刑部右侍郎詳南京刑部

胡璉 直隸沐陽人弘治乙丑進士嘉靖十年以右副都任本年陞南刑部右侍郎歷戶部右侍郎

高公韶

四川內江人弘治乙丑進士嘉靖十二年以左副都任本年致仕後起戶部右侍郎詳戶部

王綖

直隸開州人弘治乙丑進士嘉靖十二年以右副都任十三年遷大理寺卿詳大理寺

林琦

順天大興籍福建懷安人弘治己未進士嘉靖十三年起都察院右副都巡撫江西未任本年卒

秦鉞

浙江慈溪人正德甲戌進士嘉靖十四年以右副都任十六年取回都察院詳都察院

胡岳

直隸華亭人正德甲戌進士嘉靖十六年以右副都任十八年遷大理寺卿詳大理寺

王暉

應天句容人正德丁丑進士嘉靖十八年以右副都任遷南京戶部右侍郎詳戶部總儲尚書

汪玄錫

直隸休寧人正德辛未進士嘉靖二十年以右副都任二十二年遷戶部右侍郎歷左侍郎

張岳

福建惠安人正德丁丑進士嘉靖二十二年以右僉都任二十三年遷總制兩廣右副都

虞守愚

浙江義烏人嘉靖癸未進士二十三年以右副都巡撫江西地方二十五年遷大理寺卿未任聽勘歷南京刑部右

侍郎詳南

京刑部

傅鳳翽

湖廣應山人嘉靖癸未進士三十五年以右僉都御史任

兵部

張時徹

浙江鄞縣人嘉靖癸未進士二十八年以兵部右侍郎兼

書詳南  
京兵部

吳鵬

浙江秀水人嘉靖癸未進士二十九年以右副都任三

翁溥

浙江諸暨人嘉靖己丑進士三十年以右副都御史任三

蔡雲程

浙江台州府臨海縣人嘉靖己丑進士三十二年以右副

刑部

陳洙

浙江上虞人嘉靖己丑進士三十三年以

蔡克廉

福建晉江人嘉靖己丑進士三十四年以右

馬森

福建懷安人嘉靖乙未進士三十六年以右副都任歷戶部

何遷

湖廣德安衛人嘉靖辛丑進士十七年以右僉都任歷南刑部右侍郎

張元冲

浙江山陰人嘉靖戊戌進士三十八年以右副都任

胡松

南直滁州人嘉靖己丑進士四十年以右副都任

周相

浙江鄞縣人嘉靖癸未進士四十二年以右副都任四十四年致仕

周如斗

浙江餘姚人嘉靖丁未進士四十四年以右副都任四十五年卒于官

任士憑

山東平原人嘉靖丁未進士四十五年以兵部右侍郎兼僉都任隆慶元年聽調

劉光濟

直隸江陰人嘉靖甲辰進士隆慶元年以右副都任

李一元

直隸建德人嘉靖丁未進士隆慶四年以兵部右侍郎兼僉都御史任五年降一級調外任

徐枋

直隸常熟人嘉靖丁未進士隆慶五年以右副都御史任

楊成

直隸長洲人

嘉靖丙辰進士萬曆二年由應天府尹陞右副都任四年陞工部右侍郎

潘季馴

浙江烏程人嘉靖庚戌進士萬曆四年以右副都御史任陞刑部右侍郎

劉堯誨

湖廣臨武人嘉靖癸丑進士萬曆六年以右副都任陞兵部右侍郎總督兩廣

劉斯潔

直隸易州人嘉靖丁未進士萬曆七年以兵部右侍郎兼右僉都任陞戶部左侍郎

王宗載

湖廣京山人嘉靖壬戌進士萬曆七年由大理少卿陞右僉都任十年陞協院左僉都

曹大埜

四川巴縣人隆慶戊辰進士萬曆十年由應天府丞陞右僉都任十二年致仕

馬文煒

山東安丘人嘉靖壬戌進士萬曆十二年由江西左布政陞右僉都任十四年調南京用

陳有年

浙江餘姚人嘉靖壬戌進士萬曆十四年由四夷館少卿陞右僉都任十六年閑住

莊國禎

福建晉江人嘉靖壬戌進士萬曆十六年由河南左布政陞右副都任十八年陞南京刑部右侍郎

任養心

山西芮城人萬曆甲戌進士十八年四月由大理左少卿陞右僉都任

勅使江西行實

朱肇字

人洪武三十二年以給事中撫安江

西永樂二年肇奏工部遣人於江西買牛令有司遞送北京給軍屯種未免勞民今江浙湖廣有民間牧養耕牛共五千餘乞轉送給軍停買官民兩便 詔工部勘實先以牛給本處屯軍餘送北京給軍十月肇又言江西官田糧重十倍民田乞於官田折布民田輸米以甦貧民從之

古朴字

河南開封府陳州人洪武丙子鄉舉永樂四年以

戶部左侍郎採木江西事竣還京歷南京戶部尙書詳南京戶部



郭璉字時用直隸保定府新安人國子生永樂十九年以工部侍郎巡江西地方安撫軍民考察官吏本年事竣還部歷吏部尚書詳吏部

陳金字汝礪湖廣德安府應城縣人成化壬辰進士正德六年江西盜起以左都御史總制江浙閩廣諸軍務征平桃源華林等寨請建萬年縣治七年終養後歷少保兼太子太保左都御史

俞諫見巡撫正德八年江西盜熾以右都御史總制江浙閩廣軍務九年盜平改巡撫

潘鑑字希古直隸徽州府婺源縣人正德戊辰進士除南大理

評事歷江西右布政四川左布政嘉靖十三年陞右副都御史  
巡撫四川十五年以工部右侍郎兼僉都總督川湖江浙蘇徽  
等處木料二十三年陞工部尙書改督兩廣軍務詳兩廣總督  
巡撫江西行實

賈諒字子信山東兗州府嶧縣人永樂辛卯鄉舉擢刑科給事  
中歷行在都察院右副都御史宣德五年因江西豪民肆毒命  
往按之諒所施爲務悖大體不事末節凡一切怙勢害衆者訪  
訊得實悉寘於法良善獲安事平還京後歷巡川蜀山東湖湘  
淮濟各處俱以績著詳都察院

趙新字日新浙江杭州府富陽縣靈峯人以書經領永樂乙酉

鄉薦入國子監與修永樂大典永樂十一年除工部屯田司主  
事二十一年陞吏部稽勳司郎中宣德五年江西饑稅糧逋負  
寇攘時與蹇義推新陞行在吏部右侍郎勅巡撫江西討平  
蠻寇察吏治詢民瘼時畊穫定征斂蠲浮費又勸民出粟賑濟  
饑民如吉水曾希恭胡有初等廬陵陳讓等各以出穀千石奏  
聞於上賜璽書褒爲義民遣行人齎勞仍命有司復其  
衆又建議以漕淮之舟順載西江之粟兵農兩利每歲秋入  
覲報政及還少師楊文貞文敏少傅王文端等各賦詩紀其績正  
統四年還朝調吏部右侍郎蒞事南京掌部事詳淮南巡撫  
王翱字九臯直隸河間府鹽山縣人永樂乙未進士歷行人宣

總丙午以薦陞山東道御史尋陞都察院右僉都御史正統元年因江西豪俠橫暴武斷鄉民特命鎮守鄒剛果孤介斂華就實處事若平易而吏民自懼臨下雖寬裕有容而犯奸觸法者不少貸刑清政舉一方晏然未幾改勅浙江清理鹽法官至吏部尙書勲業爲昭代名臣詳吏部

楊寧字彥謐直隸徽州府歙縣人宣德庚戌進士歷刑部右侍郎正統十三年閩浙廣東草寇竊發師征未寧江右密邇三境懼有侵軼患 朝廷命巡撫至則按視郡縣當賊衝者增修城垣立排柵以斷要路團集鄉兵訓以武藝如有侵軼者輒擊斬之以故賊聞風畏避不敢犯於是時益鎮以簡靜暇則遍歷諸

郡宣上德達下情崇獎學校詢求民瘼而張弛之遠近畏慕景泰初還京奏對稱 旨有織金文綺羊酒之賜明日拜禮部尚書後改南京刑部詳南京刑部

韓雍字永熙直隸蘇州府長洲縣人正統壬戌進士拜監察御史戊辰年按治江西吉之廬陵等縣克徒乘歲饑刼掠勢甚熾雍與巡撫侍郎楊寧設法捕首賊二百餘人悉寘重典地方以寧聞寇鄧茂七反巡按御史汪澄牒鄰境勦殺尋復止雍曰律有反叛會捕之文使賊果降何憚發兵不然吾有備無患即趣進時浙江巡按黃英以汪牒調兵弗集汪卒坐死人多咎英而偉雍十四年陞廣東副使少保陳循疏雍才陞都察院右僉都

御史巡撫江西至則首行均徭歲辦法均徭者均平十排年之力役歲驗冊編設役畢九年無擾歲辦者里甲釐銀貯於官有役則估直支給擇戶領解人稱便焉 英廟復辟調山西副使坐累致仕後歷總督兩廣右都御史詳兩廣總督

原傑字子英山西陽曲縣人正統乙丑進士拜監察御史巡按江西尋陞按察使成化九年復以戶部侍郎巡視江西勦捕賊寇傑深沉有智略持身清白臨政剛決三任江西聲稱益著事寧改左副都御史理院事詳南京兵部

金紳字縉卿應天府上元縣人景泰甲戌進士授刑科給事中累官南大理寺左少卿歷南京刑部右侍郎成化十四年戊戌

江西大旱特詔巡視至則先奏停力役徵收等事仍禁郡縣  
雖小費不得以擾民俄而新昌萬載鄱陽諸縣盜發督捕有方  
竟獲其首誅之因舉救荒之政始通鹽商增糴價漸而粟至及  
勸富民補官并折收船課皆以便宜行之已而食足全活者不  
可勝計歷三年還任以久勞於外得疾卽不起餘詳南京刑部  
閔珪字朝瑛浙江湖州府烏程縣人天順甲申進士擢御史歷  
廣東按察使成化二十一年江西南贛盜起擢都察院右僉都  
御史巡撫江西至則舉廉黜貪勸賑薄賦仍革豪右橫取之弊  
京宦由是多不悅會妖人李孜省得倖因言其不勝任左遷廣  
西按察使弘治初復都御史巡撫畿甸累官刑部尚書詳刑部

李昂字文舉浙江杭州府仁和縣人景泰甲戌進士歷官河南左布政使成化二十三年值江西盜起贛州聚衆劫掠會昌信豐諸縣殺郡縣官其勢甚熾遂擢都察院右副都御史以往時官吏因循多不用命痛繩以法乃議立營堡壓賊巢穴使不能出別募勇敢士與民同操習已而進兵賊聞風皆披靡斬獲不可勝數事聞朝廷賜勅獎諭昂以今賊雖滅當立守禦計葢會昌與福建接境萬山阻絕爲上杭武平流賊所聚雖嘗有兵守禦而寡弱不支宜卽會昌武平立行都司兼統諸衛兼創巡檢司於龍南要害地庶得無虞奏上皆從賊平疏乞致仕不從移總督漕運兼巡撫鳳陽等處地方以國家重務推究其利



獎而罷行之以江西怨家騰謗去位餘詳總督漕運

金澤字德潤應天府江寧縣人成化丙戌進士歷廣東左布政使自弘治甲寅汀漳盜起其勢復熾而嶺南湖湘之不逞者從而和之四出剽掠時鎮守江西太監鄧原暨巡按監察御史都布按三司議設巡撫憲臣置司要地以節制之而割附近郡縣以隸之則盜易平具奏其事 敬皇俞其請因陞澤爲都察院右副都御史俾巡撫江西 勅書備云江西南安贛州建昌福州汀州廣東潮州惠州南雄韶州各府湖廣郴州地方交界去處盜賊生發事無統屬而江西撫州臨江瑞州等府盜賊成羣四行劫掠特命爾通行巡撫江西并各府州縣交界地方嚴督

所屬操練軍士修理城池撫安軍民捕滅盜賊祛降奸貪凡  
干賊情軍馬錢糧等項與鎮守太監董讓協和計議而行各省  
兵備守備等官俱聽節制調度爾多在南贛住劄往來巡視但  
有盜賊卽便設法勦捕尤須選委廉能屬官密切體訪及僉所  
在大戶并被害之家有智力人丁設法追襲量加糧賞或募知  
因之人務拏真正賊犯不許妄拏及容賊售攀嚇取財物擾害  
良善每月奏報已未獲數用憑稽考凡遇饑荒設法賑濟城池  
圯塞卽行築濬軍器或有損壞量宜修備司衛府縣官員中廉  
能公勤政務頗舉者量加獎勵其有隱蔽賊情退縮不捕及貪  
酷不才者除文職五品以上及軍職具奏區處六品以下爾卽

拏問輕則量情責罰重則送發巡按衙門及司府究治事有便  
於軍民地方者悉聽爾便宜處置具奏當與巡按三司計議者  
亦須公同計處務使民安賊息地方無虞斯副簡任澤奉勅  
撫定便宜從事先榜令自首而嚴督緝捕斬賊首滿天明八百  
餘顆論功罪明賞罰人多感奮思效徭徠洞蠻聞風向化四邊  
以寧又因四省交錯緝捕官員責不專一先該鎮守江西太監  
鄧原奏行將零都會昌信豐瑞金石城安遠龍南七縣各添設  
主簿一員專一捕盜惟廣東潮州府五縣惠州府七縣南雄府  
二縣福建汀州府八縣湖廣郴州五縣江西南安府三縣建昌  
府四縣贛州府三縣俱未添設捕盜機快賊縱橫無忌又奏行

將前各府州縣不分全設裁減州添設判官縣添設主簿各一員並不別差專委操練機快緝捕盜賊遇有緊用責成又瑞金縣招召鄉湖陂山場去縣六十餘里俱係深山險峒先年強賊隱藏在彼澤具奏於湖陂山場設立巡檢司一所又檄下撫屬設立關隘僉編附近居民之壯者防守要津禁遏姦細又增高贛城一尺并信豐興國南康永豐舊城圯破俱檄修葺又創巡撫院并贛州府贛縣學校俱檄重建凡百政令皆行之可久而無弊者十二年又添管南昌等十府地方本年陞南京刑部侍郎歷南院右都御史詳南京都察院

張本字孟端浙江杭州府錢塘縣人成化戊子領鄉薦錄文爲

程乙未舉進士授南京工部營繕司主事辛丑陞署員外郎主事甲辰陞都水司郎中造作營繕之地錢穀之所關稍失謹者卒罹其咎本出納惟公調度有方遂以清白著名丙午天官卿以襄陽重地簡出守適丁內艱不果赴弘治己酉改知青州府一以扶植教養爲心甫及三年治功有成壬子丁外艱乙卯復改之吉據江西上游實爲江南名郡郡多故家大族衣冠文物以閭閻相甲乙貧難中下戶服役者動以百計循理守法者固多自重豪橫縱肆侵漁剝削之患亦不能無前爲守者置弗治姑息成風本察其實一繩之以法雖貴勢有所不避小民閤然稱善當道者交章薦拔而名益重時年踰六十連章乞歸不報

庚申陞廣東布政使司右叅政壬戌陞湖廣右布政使癸亥陞  
都察院右副都御史巡撫江西時表瑞間盜發特榜示之喻以  
生殺利害盜遂逃散地方以寧凡百設施一從寬厚而周窮濟  
急伸冤理枉惟恐不及蓋本守吉特威名素著故雖處之以寬  
而民之懾服自不敢犯乙丑 武宗嗣位有白金文綺之賜推  
恩進階通議大夫正德丙寅致仕性剛介遇事敢爲無所顧忌而  
清操苦節始終一致戊辰卒年七十二

林俊字待用福建興化府莆田縣人成化戊戌進士歷刑部員  
外郎疏劾請斬妖僧繼統而黜近幸梁芳言甚激烈忤 憲廟  
下獄謫姚州歷廣東右布政使陞南院右僉都御史十五年命

巡視江西著社約立社長社正以主之去淫祠表忠賢士禁奸  
弊雖市販小害必懲之鋤強扶弱風紀肅清時寧庶人貪譎伎  
害倍取祿米官校害人侵牟民利俊悉裁抑其奏易府殿琉璃  
瓦疏極言其非謂乞斷大義特垂善處毋涉吳王几杖之賜叔  
段西鄙之求時濠雖橫未有逆萌或以爲過後卒如公言人服  
其先見云 武皇初政起俊巡撫江西上疏力辭未幾改撫四  
川後歷刑部尚書加太子太保詳刑部

柴昇字公照河南內鄉縣人正德二年以右副都御史任尋革  
詳南京兵部尚書

王哲字

直隸蘇州府吳江縣人幼倜儻有大志十二補縣

學生浮梁戴公珊督學政以國士期之弘治二年己酉以易經  
領鄉薦三年登進士授江西道監察御史福建清軍兼理鹽法  
時有以同姓被誣爲戍卒者百餘家淹禁累年一訊卽辯其枉  
出之軍籍又多隱漏弊設法清理歲以千計所領鹽法課又最  
於他御史十年出按廣東激揚允當屬部以下皆望風竦然時  
劇賊陳光等流劫新會東莞二縣哲畫策不旬月平之南海縣  
十三村負固數爲亂鎮巡議屠之哲曰茲村戶不下萬餘豈無  
一良善者乎玉石俱焚吾不忍也乃輕騎率廣州知府詣其巢  
諭以禍福且許自新其父老感泣曰巡按公活我卽解散從令  
又每村立土里長以約束之十三村竟無事旣而以外艱歸民



號泣追送不忍去服除授廣東御史十五年出按江西風裁如  
廣東所至卹民隱作士風表先賢祠墓董鎮守怙勢凌侮縉紳  
至匿盜賊不以聞人莫敢問哲首劾其不法數事上切責鎮  
守且以治盜事付哲嚴限有司遂擒盜魁賜勅獎諭時天旱  
種不入土乃親錄繫囚出其所當原者數百人翊日雨是歲有  
秋又善斷疑獄民有女奴自逃其簪指爲故殺訟於官者獄旣  
成哲復訊見其有冤色使人訪女奴所在得之民得不坐又有  
大家被盜因誣其所怨者賂鎮守欲置諸法哲察其誣出之鎮  
守怒衆亦以爲疑後眞盜出始皆愧服以爲不可及民爲之謠  
曰江西有一哲六月飛霜雪天下有十哲太平無休歇至今論

巡按之賢者必爲稱首云十六年陞山東按察副使守備臨清  
舉持綱領不屑細瑣民安之夷人入覲私市鹽罔利事覺哲  
謂不治則廢法治之則非所以柔遠人乃請沒鹽于官仍給其  
直與之時逆瑾初橫中貴人有忤瑾斥南京者道死臨清乃置  
棺埋之人爲之危不卹也正德三年改任本省叅政尋以撫按  
交薦可大用遷廣東按察使未幾進南京都察院右僉都御史  
領操江事上言操軍脆弱異日有警必不能支其後流賊弄兵  
江上果如所慮五年有江西之命再改巡撫忤宸濠中毒乞歸  
猶日以江西爲念逾年吏部奏將起用以病卒壽五十有七生  
平孝友樂於周恤於書無所不讀尤熟於史喜讀好書說好話

行好事做好人之詩顏其所居曰好齋卒之日貧無以殮至今子孫窘乏無產業人益服其廉介所著有好齋集十卷

大學士靳貴云某歲公來自江西爲予言江西都司有以賊革任者福建林公俊來巡視復用之公不可怒移文語侵公公不以介意且諭三司以林公先朝名臣處斷必不苟意者爲申稟不詳所誤且令再具事本末以請林見公直而遜太悔悟卽罷其人弗用因重愛公比歸賦詩贈別逸之數程此予所親聞者而狀不及公之嘉言善行遺逸者多矣予於是重悲之

董傑字萬英號五城直隸寧國府涇縣人成化丁未進士出知沔陽州未幾左遷四川行都司事考最轉知河南鈞州又考最

轉刑部員外郎復轉郎中尋轉知保定府正德戊辰轉山東左  
叅政庚午轉河南右布政未幾轉湖廣左布政又未幾轉都察  
院右副都御史巡撫江西在四川嘗攝邛州事興水利有功州  
民德之掌松茂州事督糧運有法夷人畏之在鈞州豪右斂跡  
田里樂生若學校農桑尤加之意遂致時和年豐粟有一莖五  
穗瓜有一蒂五實者在刑部嘗慮囚山東人無冤者保定滯獄  
千餘人奏詞數千百紙比至甫半月剖決殆盡囚圉空虛郡當  
官道使客結軫密邇京師私書盈篋前守多不堪之饒應接  
如流不茹不吐人皆敬憚號爲神明他如練民兵積芻粟厥後  
霸州盜起保定獨以有備無恐在山東嘗部京儲不忍解戶稱

貸率身任之在江西僅七八月當四郊多壘晝夜經略不遺餘力賊以漸平正德六年得疾遂不起

任漢字

四川成都府溫江縣人成化丁未進士歷江西左

布政使正德七年陞都察院右副都御史巡撫江西地方時廣饒等處羣賊依憑深阻爲黎氓患用兵已歷年官顧其私兵不協力費以萬舉任事如叅政吳廷舉旣爲姚源賊執及副使周憲督兵華林桐梓嶺又援兵不至父子死於鋒鏑漢束手無策雖更置總制賊始平定而州縣破壞極矣九年三月以養病去任後起原官撫鄖陽十一年陞南京大理寺卿詳南京大理寺俞諫字良佐浙江嚴州府桐廬縣人弘治庚戌進士授知長清

縣歷南院右副都御史正德癸酉江西有司奏姚源賊王浩八  
率五洞蠻兵劫掠州郡甚猖獗上勅往督軍務諫選將運籌  
靡間晝夜凡九戰皆大捷遂蕩平其巢穴又增置萬年縣治建  
城池割都里豁賦稅舉有成筭以功進右都御史賞賚白金表  
裏詔復巡撫其地建昌曰徐九齡者爲患尤極積三十年官  
軍不能討復命師盡擒以還上喜手詔褒獎加俸一級時宸  
濠方畜異志以得上賜欲撫臣以下朝服諫不可又去其左  
右爲惡者濠怨甚屢欲殺之幸得免以疾乞休乃內賄閹權以  
奪其官旣歸杜門不出者六年惟開義學教鄉子弟暇日讀書  
賦詩而已嘉靖元年詔起督漕運兼理巡撫後召掌院事詳

都察院

孫燧字德成其先自後唐稱廉吏三司使岳始葬餘姚燭湖之  
北子孫遂家焉自幼英爽不羣年十有七補邑庠弟子員泮東  
拙菴楊公一見奇之遂妻以女且招致館穀令坐一小閣致學  
十餘年弘治壬子以易魁鄉薦癸丑登進士前後學者爭師事  
之丁丑三月授刑部貴州司主事初任例典獄一月舊皆慮重  
囚生變或縱犴卒凌虐致死燧獨加意矜恤時方盛暑疫癘令  
日採蒿艾爲之薰調囚者醫療產者給粥囚咸感泣不數月卽  
著能聲推掌議敘癸亥辛酉六月陞本部江西司員外郎壬戌  
秋承委決囚南圻以明斷稱癸亥四月陞署本司郎中七月實

授乙丑奉 勅錄囚江右多所平反正德戊辰己巳庚午丁酉  
外艱以前執法忤逆瑾追罰粟數百石辛未服闋赴京八月復  
除本部湖廣司郎中十二月超擢福建布政司叅政奉 勅督  
理糧儲初閩賦積逋士不受糧已半載時米價石銀三錢而侵  
逋三倍其值乃議減價嚴限追給以便軍民羣議難之燧毅然  
出令懸示吏民曲盡其隱軍民樂從未逾月逋完餉給常歲派  
糧藩司掌印督儲官會集書計者數十於後堂編泚月餘冬始  
頒屬吏得因緣爲市而自春徂夏穀食將盡催徵始急人無完  
膚累年逋欠燧知其故乃悉閱舊牘推考利病所由以便宜爲  
轉輸之方酌本折之宜吏受成案令頒於刈穫之先而梓給戶



國朝文獻卷之三  
曉一洗期慢之舊民樂告輸歲終畢斂在昔侵攬把持宿弊搜剔殆盡委勘武平功冊親詣地方訪覈真跡削賄冒勢奪登血戰者各數人讒怨弗恤也過建寧爲晦菴祠置田五十餘畝癸酉冬十一月陞貴州按察使未任甲戌改山東蒞任僅半載剖決如流吏民咸服乙亥六月轉河南右布政使與左使同心協濟甫三月甚得民心冬十月推陞都察院右副都御史巡撫江西地方去汴之日耄倪攀戀初江西寧庶人宸濠辨慧桀黠善匿情市交以希寵取威而箝制人口惟其所欲旣誣陷方伯鄭岳一時慾餌威攝士類傾心由是藩臬司印啓閉署掌皆稟受方行朝令礙彼者弗敢外宣繼再得護衛妄窺天意者倡爲

獻諛旅賀時又妄傳護衛爲侍衛令旨爲聖旨而文牒往來輒稱國主由是濠益志驕而遂睥睨神器矣惟時羣寮才智者中立自免而一二忠朴又爲巧言孔壬所欺將爲順時善處理當如是及副使胡世寧疏奏言及濠亦知傲自勅乃推過近屬痛懲其黨數百人以自解其妄希佐命者以騎虎之勢爲之力除異已先假生辰徵召羣賀期必致世寧凡上世寧既不往乃更嗾濠誣奏再奏且爲之泚徵夫銀十萬兩以助其交構備兵之資暨世寧得旨提問潛身投獄已被掠服而復行江西會勘恃被羣僚多其心脅欲踵先陷鄭岳故事奏外別附他罪賴言官正論劾退其心脅數人又推燧巡撫燧毅然謝遣家屬單

車抵任持風紀懷禮度外和內縵彼濠然不能餌威不能劫遂  
失其鈴束故智又得巡按李潤者劾退其元謀由是士心有畏  
而始回藩臬有司各行其政雖有一二遺奸內托心膂者外亦  
稍爲異同以存形迹不如向之公然旅附矣由是彼謀遂懈燧  
因得委曲明世寧無辜世寧得減死戍遼江西民歷盜殘兵擾  
之餘加以附勢科虐之極居民口不聊生商旅望城遠避人情  
洶洶燧加意撫恤每見濠輒諷以大義動以至誠濠亦外飾賢  
名曲示聽納於是嚴謫其黨尤者數十以例其餘舊徵夫銀等  
項一切報罷一時民困稍甦生理漸復商旅往來舟楫輻輳如  
故其節吏治則守巡官歲限所歷近四遠二及郡縣目今書折

事於冊及報守巡至止行事之詳以稽勤惰其重農事則災傷之地官給種穀高旱之地爲濬溝渠平窪之田爲築陂岸而水旱必爲之竭誠禱應其均差費則革下里槩徵之弊定人戶九等之則而又專責牧守手判派徵額數一洗吏胥之弊痛懲包攬之徒其足軍食則令屯田該徵子粒就准軍士該徵月糧以免出納之逋擾至於執議水夫槩徵工食之不可而仍擬勾丁馬頭解人執役之不便而照前雇役及求緩中使之燒造是或抗疏於朝或投劄當道雖一時所行或不能盡如其意然於事關民生休戚者皆殫心竭力而爲之成敗利鈍所不計也巡歷所至問民疾苦隨宜撫恤凡公蠹鄉土豪惡爲民害者皆於平

日訪實記冊至則選吏分捕而窮治之罔不切中欺隱痛愜民情每謁文廟必進諸生反復講論諭之道理特廣文山祠宇贊其忠節此所以風勵人心激勸忠義至於各屬選練軍快措積帑藏城進賢城南康城瑞州奏立安義新縣奏留饒州兵備奏議九江兵備兼攝南康寧州武寧瑞昌及湖廣興國通城等郡邑奏乞湖東分巡兼理兵備專駐撫州奏設南康府巡邏通判管攝鄱陽湖魚船廣信府通判鈴束弋陽等縣密戶是皆所以預防要害陰折逆謀內雖九江湖東二事陰阻不行然濠實以憚其多備遲回五年未敢卽發維時不幸武廟頻年巡遊中外人情洶洶鎮守太監畢真奉勅與燧同議機務者也首先

附逆事因掣肘清軍御史范輅劾其奸惡濠時與真比密緝奏  
捕禁獄三司郡縣遂爾奪氣莫知所恃矣濠復肆志縱其素畜  
羣賊各處流劫以肆兵逞威燧時累疏上不報深惟朝廷懿  
親不敢擅圖先發而親近撫屬中除副使許達知府鄭繼陳槐  
之外無一可托者日與達等計議先欲悉捕羣賊翦其羽翼使  
驟難舉以俟聖明之悟成命之下而一鼓擒之然時賊首七  
二既投入其宮府醜類千百又深匿其林墓况濠故智置燧左  
右廝役皆其心膂言動必知由是達等雖累受算時報覓獲而  
終難擣其巢盡其類也時憂勞成疾連疏乞休又未得請亟命  
畫工自圖蓋已分一死報國靡他矣濠先居父喪矯飾禮巡

按者奏舉其賢孝於朝今居母喪踵前故事脅有司遞申鎮巡  
官求舉燧討欲緩其逆謀而徐爲可圖且謂忠孝一道稱其孝  
或所勸其忠遂與林御史朝等具疏以上廷議頗駭然會南昌  
人張儀官於京衛備以其實告御史蕭淮乃暴其狀以聞於  
是遣勳威重臣戒諭未至而逆校林華自京馳報濠懼已卯六  
月十四日因各官入謝生辰宴禮兵衛戒嚴濠出立露臺曰  
太后有密旨令我起兵監國燧請密旨看濠語塞叱曰不必多  
言我往南京汝保駕否燧曰天無二日臣安有二君有太祖  
法制在誰則敢違濠怒入殿庭易戎服出呼燧罵曰我何負於  
汝奏我七本燧亦曰朝廷何負於汝欲反耶一時官屬駭愕

相傾獨按察司副使許逵反覆辯論且厲聲曰我輩亦安面戈  
臣今日何得如此濠大怒喝令武夫縛曳逵達出諸惠民門外  
許與逵同罵不絕口膝終不屈而卒許素忠勇志擒凶逆使其  
在外必能稱兵爲國討賊然以先陷世寧者爲檄賀生辰之舉  
羣寮歲至後任者以爲常制莫敢爲故亦在城同遇害也時盛  
暑天忽起黑雲恒蔽其屍濠聞亟移進賢門外亦如之濠乃驚  
懼卽遣僞指揮王世寧買棺殮之是日濠遂分部黨各處追印  
起兵以反首及進賢知縣劉源清等聞變城守殺其所差親屬  
婁伯等都御史王公守仁知府伍文定等各倡義起兵討賊伍  
卽製燧及許禪主迎次文山祠爲文率吏民泣奠舉義旗而東



及郡吏民間燧被害罔不哀憤響應王公帥之甫四旬而濛遂就擒餘黨悉滅及世宗皇帝入繼大統首下明詔稱其節義令禮部議上超贈禮部尚書諡忠烈廕子一人世襲百戶工部委官營葬事且賜祠額曰旌忠繼以言者加廕子正千戶世襲維時論祭文有勞心撫治才譽彰聞預防逆藩曲盡心力倉卒遇變視死如歸憤激抗詞凜然英烈之言燧平生手製有四聖糟粕十卷詩文啓劄六卷奏議四卷案牘稿十卷恤刑錄二卷巡撫榜文一帙存於家

王守仁字伯安號陽明浙江紹興府餘姚縣人弘治己未進士正德十一年以都察院左僉都御史鎮撫南贛汀漳等處時歲

濠陰謀不軌亦已有年十四年六月初九日守仁自贛起行欲  
往福建勘事十五日至豐城典史報宸濠反狀繼而知縣傾必  
言其詳守仁度單旅難卽勤王亟欲迴流趨吉安集兵觀其動  
靜以圖萬全時南風方盛欲南至吉安則風逆聞宸濠亦發千  
餘人來迎欲發舟舟人以逆流南風爲辭守仁密禱於舟中無  
何而北風大作舟人猶不肯行乃拔劍馘其耳遂發舟薄暮度  
勢不可行潛覓小漁船以微服作繹夫下船急去留麾下人  
服冠服在舟中已而宸濠兵果犯舟而守仁不在遂捨之守仁  
是夜舟至臨江知府戴德孺聞至留入城調度守仁曰臨江與  
省城相近且當道路之衝莫若抵吉安爲宜又以三策籌之曰

宸濠若出上策直趨京師出其不意則宗社危矣若出中策則趨南都大江南北亦被其害若出下策但據江西則勤王之事尙易爲也行至中途恐其速出乃爲間牒假朝廷密旨知寧府將反行令兩廣湖襄南京兵部各命將出師暗伏要害地方以俟寧府兵至襲殺復取優人數輩令其至伏兵處所飛報竊發日期將公文各縫藏袷絮中將發間又捕捉李士實家屬至舟尾令覘知故縱之令其奔報宸濠邀獲公文遂疑不敢卽發十八日至吉安知府伍文定出迎遂入城撫慰軍民兩上疏飛報宸濠於是月十四日謀反擅殺都御史孫燧副使許逵并執縛巡按與都布按三司官及府縣等衙門大小官員不從

俱囚之盡收在城各衙門印信及搬搶各庫藏一空釋在城  
各監重囚并糧蘇江而下聲言直取南京又差儀賓校尉人等  
持檄至各府州縣曉諭收取印信驅截水兌糧船請命將征討  
以解東南倒懸奏至兵部尙書王瓊揚言於朝曰王某在南贛  
必能擒之不久當有捷報至但 朝廷不命將出師則無以壯  
其軍威時寧王畜養死士二萬招誘四方盜賊渠魁亦萬數其  
護衛黨與并脇從之人又六七萬虐焰張熾守仁以百數從卒  
退保吉安遙爲牽制之圖督率知府伍文定戴德孺邢珣徐璉  
等調集軍民兵快召募四方報効義勇會計一應留解錢糧支  
給糧賞造作軍器戰船奏留公差回任御史謝源伍希儒分職

任事約會鄉官相與激勸忠義曉諭禍福又恐宸濠知其調度覺其間牒發兵順江速出又密使劉養正家屬及平日與宸濠往來鄉官陰致歸附之意以緩其出直俟調度已定乃移檄遠近宣布朝廷仁德暴露宸濠罪惡於是宸濠始覺爲守仁所欺乃先發兵出次南康九江至七月初二日宸濠又使人探之兵不出乃留兵萬餘屬腹心宗室等官使守江西省城自乃引兵向安慶守仁探知其出遂星馳促各府兵期以本月十五日會於臨江樟樹鎮身督伍文定等兵徑下於是知府戴德孺徐璉邢珣通判胡堯元童琦談儲推官王暉徐文英知縣李美李楫王大興王冕亦各以兵來赴十八日遂至豐城分路前進

攻門入談儲王暉李揖王天與王冕等各以其兵乘七門之隙從傍夾擊以佐其勢是日又探得宸濠伏兵千餘於新舊坟廠乃遣奉新知縣劉守緒典史徐誠領兵四百從間道夜襲破之以搖城中十九日發市汊乃大誓各軍薄暮齊發二十日黎明各至信地呼喚並進梯絙而登城中之兵皆倒戈退奔城遂破擒其居守宜春王拱櫟及僞太監萬銳等千餘人宸濠宮中眷屬縱火自焚延燒居民房屋乃令各官分道救火撫定居民釋散其脇從封其府庫搜出原收大小衛門印信九十六顆其脇從布政使胡璉叅政劉裴叅議許效康副使唐錦僉事賴鳳都拮揮王玘皆自投罪守仁先上江西捷青疏仍分兵四路追攝

是時宸濠攻圍安慶未下及聞守兵至豐城大恐卽欲回舟  
李士實阻勸宸濠不應次日遂解安慶之圍移兵泊阮子江會  
議歸援是日撫州知府陳槐引兵亦至乃遣伍文定邢珣戴德  
孺徐璉共領精兵五百分道並進擊其不意宸濠亦先使精悍  
千餘人從間道欲出不意攻收省城偶遇於某處遂交戰我兵  
失利報至守仁怒甚欲以軍法斬首明日各帥兵奮死以戰其  
兵大敗之又遣都指揮余恩以兵四百往來湖上以誘賊陳槐  
胡堯元童琦談儲王暉徐文英知縣李楫李美王冕王軾劉守  
緒劉源清等使各領百餘四面張疑設伏候伍文定等交兵然  
後四起合擊分布既定大賑城中甯民親慰諭之以安其心又

出給告示凡脇從皆不問雖嘗受賊官爵能逃歸者皆免前  
斬賊徒歸降皆給賞使內外居民四路傳布以解散其黨二十  
三日宸濠先鋒已至樵舍風帆蔽江乃分督各兵乘夜趨進使  
伍文定以正兵當其前余恩繼其後邢珣引兵繞出賊背徐璉  
戴德孺張兩翼以分其勢二十四日早賊兵鼓譟乘風而逼黃  
家渡其氣驕甚伍文定余恩之兵佯北以致之賊爭進趨利前  
後不相及邢珣之兵從後橫擊直貫其中賊敗走伍文定余恩  
督兵乘之徐璉戴德孺合勢夾攻呼譟並起賊遂大潰奔走十  
餘里擒斬二千餘級落水死者以萬數賊勢大沮引兵退保八  
字腦宸濠震懼身自激勵將士賞其當先者以千金被傷者銀



百兩盡發九江南康守鎮城之兵以益師是日建昌知府曾璵  
引兵至守仁乃遣知府陳槐合饒州府知府林瑛之兵乘間以  
取九江知府曾璵合廣信知府周朝佐之兵乘間以取南康二  
十五日賊復并力盛氣挑戰而風勢不便我兵少却死者數十  
人守仁急令斬取先却者頭知府伍文定奮督各兵殊死并進  
砲及宸濠舟宸濠遂大敗擒斬二千餘級溺水死者莫計其數  
賊復退保樵舍聯舟爲方陣盡出其金銀以賞士守仁乃夜督  
伍文定爲火攻之具邢珣擊其左徐璉戴德孺出其右余恩等  
各分兵期火發而合二十六日宸濠方朝羣臣拘集所執三日  
各官責其不致死力諭未決我兵已奮擊四面而集

副舟衆遂奔散宸濠與妃嬪泣別宮人皆赴水死遂殺宸濠其母子郡王將軍儀賓及僞太師元帥叅贊尚書都督都指揮千百戶等官李士實劉養正劉吉屠欽王綸熊瓊盧行羅璜丁璵王春吳十三凌十一秦榮葛江劉勛何鍾王信吳國七火信等數百餘人被執脅從官太監王宏御史王金主事金山按察使楊璋僉事王疇潘鵬叅政程杲布政使梁辰都指揮郊文馬驥白昂等擒斬賊黨三千餘級落水死者約三萬餘棄其衣甲器仗財物與浮屍積聚橫亘若洲餘賊數百艘四散逃潰復遣官分路追勦二十七日及之於樵舍大破之於吳城又破之擒獲復千餘級落水死者殆盡宸濠旣擒衆執以見呼曰王先生

我欲盡削護衛所請降爲庶民可乎守仁對曰有國法在遂低首無言又令載至囚所行數步回向曰婁妃常勸我不娶爲此事是我不聽實非其罪今死於水望先生收其屍一葬守仁曰謹領乃爲收葬婁妃之祖諒與叔祖謙皆吳康齋門人諒卽一齋婁先生故其子孫皆有祖父風如諒少子謙豫瑜尤知學問自立故守仁於叛逆擒執之日原其有辜無辜國法只行於性予其他皆不及雖性予無辜者亦縱之使逃他如李士實劉養正王春等族屬亦多原宥之劉養正舊從守仁游至母死未葬爲葬又爲文祭之曰吾不敢宥汝之生以葬汝之母可謂故舊不遺情法兩盡先是宸濠以賄結 朝廷左右及大小遠近

臣僚皆記於籍守仁得於其宮中悉焚之其掩惡安人如此都御史孫燧副使許逵被宸濠殺棄其屍首爲具衣衾棺槨而斂之令各屬及耆民里老人各致祭又與委曲奏保以表其忠節時朝廷差安邊伯許泰爲總督軍務統總兵官平虜伯江彬爲提督等官左都督劉翬爲總兵等官太監張忠爲提督軍務太監張永爲提督贊畫機密軍務并體勘宸濠等反逆事情及查理庫藏宮眷等事太監魏彬爲提督等官兵部侍郎王憲督理糧餉往江西征討行至中途聞宸濠已擒捷報至京計欲奪功乃密請武宗皇帝親征武宗遂自稱爲總督軍務威武大將軍總兵官後軍都督府太師鎮國公欲往江西親征江彬

許泰劉翬張忠張永魏彬等皆先領兵由大江至江西入居城中彼輩皆倡言誣守仁始同宸濠謀反因見天兵猝臨征討後始擒宸濠以爲功脫罪欲并擒守仁各爲已功守仁初見其兵馬之盛意有不善乃托疾不出爲餉以銀犒各京邊官軍以慰勞之有病者爲之醫藥死者爲之棺殮又親自行撫衆心皆悅及度其無何然後出見忠彬泰翬輩諭以武宗將欲親征之意欲將宸濠放置城中待駕與彼輩殲陣重擒之以爲功守仁乃語之曰逆黨潛伏尙多萬一疎虞則事勢不可救矣卽欲將宸濠并眷屬黨與交付與彼又不可欲解見武宗皇帝彼又行驛止之因托疾不出張永乃暮夜訪之排闥入卧内語以

衆人欲功之意守仁乃備以盡公爲國及募兵征勦之計永城  
知其忠與功私與衆語其忠以陰懈其謀彼乃訪所原有悉擒  
而殺之以爲功又逮捕冀元亨誣以同反遂各引兵南京候  
武宗乃疏力止聖駕親征以爲平賊獻俘固 國家常典亦臣子  
職分謹於九月十一日親自量帶官兵將宸濠并宮眷逆賊情  
重人犯督解赴 闕行至廣信聞報知疏上 武宗不聽又聞  
道路傳云 欽差總督軍務威武大將軍鎮國公朱 帶領安  
邊伯朱太監張左都督朱提督等官司禮監太監魏平虜伯朱  
并督理糧餉兵部左侍郎王領兵將至南京欲赴江西征勦繼  
奉 欽差總督軍務軍門鈞帖及續奉准 欽差總督軍務充

總兵官安邊伯朱各差官賁手本中途阻守仁又要將所解宸  
濠等犯回至江西省城聽候會審守仁謂既有總督軍門鈞帖  
自合解赴南京面受節制日夜前進行至浙江杭州府又遇  
欽差提督贊畫機密軍務御用監太監張永又准總督軍門鈞帖  
開稱宸濠等待親臨地方覆審明白具奏軍門定奪守仁因度  
前進既有不能退回愈有不可若再遲延必成兩誤乃暫留浙  
江案衍浙江按察司轉呈 欽差提督贊畫機密御用監  
太監張請會同監軍御史公同當省都察院三司等官將見解  
逆首宸濠及逆黨劉吉等各犯并宮眷馬疋等項逐一交查明  
白仍請張永徑自另委相應官員兵快管押帶回江西省城從

宜審處未及交復上捷音以爲宸濠不軌之謀已踰紀今月之間遂克堅城俘擒元惡是皆 欽差總督威德指示方略所致以此歸功總督軍門以止 武宗江西之行初在江西於江彬許泰張忠諸人既去之後卽欲將宸濠由九江解至南京見 武宗因慮江彬之徒必將復來奪俘遂解由廣信之浙江而江彬許泰張忠之徒又至武林要奪守仁聞知將宸濠監櫃浙江驛自詣北新關見彬忠泰等乃請浙江三司官面交付彼轉解赴闕復慮彬忠等害已乘夜渡江過越一見祖母與父卽日至浙江驛欲回江西初江彬許泰張忠謀欲奪功實欲誣守仁反坐爲將叛逆擒而誅之并爲已功張永知謀又聞與語之



詳乃私與家人謀曰王都御史乃忠臣爲國今欲以此言害之  
天理何在我若不爲一明其冤何可當也他日朝廷有事何  
以使臣子之忠及復命先見武宗備言其盡心爲國之忠  
之功且言彬等欲加害之意旣而江彬許泰等皆果誣言其無  
君欲叛武宗皆不信乃謂之曰王都御史乃我家忠臣你等  
如何好這等說江彬泰忠之謀遂不行張忠因守仁在杭言不  
至南京見上言此旣不信試召之必不來則可知無君矣  
武宗乃召之守仁卽奔南京龍江關將進見張忠皆失意又從中  
沮之使不見守仁乃綸巾野服入九華山欲爲道士張永聞知  
又力言於武宗曰王守仁實忠臣今聞衆爭功欲害其忠

入山出家爲道士由是武宗皇帝益信其忠守仁不仕至洪  
西省城視事至是江西安堵人皆深感家肖其像歲時報祀十  
五年閏八月四乞省葬節奉武宗聖旨王守仁奉命巡視  
福建行至豐城一聞宸濠反叛忠憤激烈即便倡率所在官司  
起集義兵合謀勦殺氣節可嘉已有旨着督兵討賊兼巡撫江  
西地方所奏省親事情待賊平之日來說遂復領巡撫事江西  
兵殘之餘宗室人民凋敝之甚官府衙門居民房屋燒毀殆盡  
爲之賑恤綏勞撫定又爲奏免百姓租稅又將城中官民沒官  
房屋及宸濠違制宮室與革毀一應衙門皆修改爲公廨又以  
宸濠占奪民間田地山塘房屋遵奉詔書給還原主管業其

餘照依時估變賣價銀入官先儘撥補南新二縣允軍淮安京庫折銀糧米及王府祿米餘羨收貯布政司官庫備用緩急是年三月武宗晏駕世廟登極特降聖書慰勞行取馳驛赴闕宴賞於六月十六日奉勅旨以爾昔能勦平亂賊安靖地方朝廷新政之初特茲召用勅至爾可馳驛來京毋或稽遲於二十日馳驛起程爲輔臣所忌潛諷科道建言以爲朝廷新政武宗國喪資費浩繁不宜行宴賞之事行至中途而返道經錢塘上疏懇乞便道歸省朝廷准令歸省陞南京兵部尙書叅贊機務詳南京兵部

鄭岳字汝華福建莆田縣人弘治癸丑進士歷官江西布政

使時提學李夢陽與巡按江萬實計奏行都御史陳金三司  
掌印官會勘岳欲平其理而夢陽務求勝憾岳遂通宸濠構陷  
坐是爲民正德十四年六月濠反守備楊銳都御史吳廷舉御  
史熊相唐龍尙書喬宇各論薦起四川以服未闕辭十六年九  
月起右副都御史巡撫江西以水災奏減民賦二十萬築江岸  
省兵快清滯獄別功罪祠忠節嘉靖元年召爲大理寺卿詳兵  
部侍郎

陳琳字玉疇福建莆田縣人弘治丙辰進士任御史提督南畿  
學校忤逆瑾矯詔榜琳爲奸黨二年琳因瑾排除大臣顯出臺  
諫上言惜老成宥狂直謫廣東揭陽縣丞五年九月瑾誅詔復

官敘用七年起山東提學副使歷

十六年陞巡撫

江西右副都御史嘉靖元年陞南京大理寺卿詳南京兵部右

侍郎

盛應期字斯徵直隸吳縣人弘治癸丑進士授工部都水司主

事謫縣丞正德元年任武昌府同知四年歷雲南副使十三年

歷陝西左布政使十四年陞巡撫四川右副都御史十五年丁

憂嘉靖元年起撫江西地方三年陞兵部右侍郎兼右僉都總

制兩廣詳總理河道右都